



Monsieur Fernand Etgen
Président de la Chambre des Députés

Luxembourg, le 24 avril 2020

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Edukatiounsminister weiderzeleeden.

Eisen Informatiounen no bleiwen, op Grond vun der aktueller sanitärer Situatioun, alleguer d' Restopolis-Restauranten a -Cafeteriae bis op Weideres zou. Als Alternativ bidden d'Prestateuren de Schüler vum 4. Mee un eng personaliséiert „Frupstut“ un. Et ginn dem Schüler Platen wéi Sandwichen oder Zaloten ugebueden. Iwwert d' Internetsäit oder d' App kann een 3 Menü-Formulen reservéieren di da moies téschent 9:30 an 11:30 virun de Kllassesall bruecht ginn.

An dësem Kontext well ech folgend Froe stellen:

- A wéi engem Emballage gëtt des „Frupstut“ (y compris de Couvert) geliwwert ?
- Sëtzt de Minister op Nohaltegkeet an deem gratis PET Fläschen ugebuede ginn?
- Wann d'lessen téschent 9.30 an 11.30 ausgeliwwert gëtt, wéi gëtt sécher gestallt dass näischt dra verdierft?
- Ass de Minister der Meenung, dass 1 Zalot an/oder 1 Sandwich den Ernährungsbesoine vu Jugendleche gerecht gëtt?
- Wou iessen déi Jonk hier „Frupstut“? Kann de "*social distancing*" assuréiert ginn wann di Jonk zu Metteg iessen oder gëtt an der Schouklass giess?

Mat déiwem Respekt,

Diane Aehm
Deputeiert

Äntwert vum Minister fir Educatioun, Kanner a Jugend op d'parlamentaresch Fro Nr. 2089 vun der honorabeler Deputéierten Diane Adehm

Ad 1)

D'Platen an d'Produkter, déi d'Gäscht online bestellen, ginn an enger Pabeierstut geliwwert. Restopolis benotzt zanter Februar 2019 keng Plastikstute méi, fir de Gäscht gratis matzeginn a gräift och elo an der Kris net op esou Tuten zeréck. D'Zaloten an déi kal Mëttesplate ginn an ekologesche Barquetten zerwéiert, déi och biologesch ofbaubar sinn. Wann et wärend der Covid-19-Kris zu enger Rupture de stock vun ekologesche Barquetten komme kéint, wéi dat och bei anere Produkter kéint passéieren, misst Restopolis op d'Plastiksbarquetten zeréckgräifen, fir weider kënnen d'Ausliwwerung vun de Frupstuten ze garantéieren. D'Gäscht, déi eng Frupstut bestellen, ginn iwwer d'Internetsäit an d'sozial Medie vu Restopolis sensibiliséiert, fir hiert eegent Besteck matzebréngen. An dëser Krisenzäit ziele mir staark op d'Eegeverantwortung vun de Gäscht fir sou wéineg wéi méiglech Offall ze produzéieren. Restopolis wëll jiddereen, dee keen eegent Besteck huet, mat engem Wegwerfbesteck depannéieren wann de Gaascht eent bestellt. Dat besteet aus Holz an ass a Pakpabéier agepakt. Wann et zu enger Rupture de stock vum hëlze Besteck komme sollt, giff Restopolis op alternatiivt Besteck zeréckgräifen.

Ad 2)

Restopolis engagéiert sech weiderhi fir eng nohalteg Schoul- an Unirestauratioun. An der Campagne "Restopolis goes green", déi 2019 organiséiert ginn ass, huet de Service seng Gäscht sensibiliséiert, an hirem Schoulalldag op PET-Fläschen ze verzichten a léiwer e Bidon ze benotzen, dee si an der Schoul mat Krunnewaasser opfëlle kënnen. Zanter 2019 verkeeft Restopolis an all senge Restauranten zum subventionéierte Präis vu 7 Euro de Bidon myCan aus Inox fir kaalt a waarmt Gedrénks. Et gouf awer festgestallt, datt vill Gäscht nach ëmmer keen eegene Bidon hunn. D'Covid-19-Kris verlaangt hygieenesch Moosnamen, déi leider méi Verpackungen oder Wegwerfprodukter wéi Masken oder Händsche mat sech bréngen, wéi virun der Kris, an dat fir Liewen ze retten. Mat der gratis Fläsch Waasser, déi optional ugebuede gëtt, soll verhënnert ginn, datt Kanner, déi keen eegene Bidon hunn, um Krunn drénken an sech esou mat dem Virus ustiechen. Déi gratis optional Fläsch erlaabt awer, déi Kanner ze depannéieren, déi kee Bidon hunn, a verhënnert, datt se deshydratéieren. Dernieft hunn d'Kanner keng Méiglechkeet, sech Gedrénks aus engem Automat ze huelen, well d'Gedrénksautomate wärend der Covid-19-Kris net a Betrib sinn.

An der Covid-19-Kris ass de Schutz vun der Gesondheet vill méi schwéier kompatibel mat dem Schutz vun der Ëmwelt. D'PET-Fläsch ass déi beschten hygieenesch Léisung fir eppes ze drénken, wann de Gaascht keen eegene Bidon dobäi huet. Zu Lëtzebuerg ginn haut 80 % vun all de verkaafte PET-Fläsche recycléiert. Selbstverständlech sensibiliséiert Restopolis nawell wärend der Kris seng Gäscht, hir eege Bidonen an hiert eegent Besteck matzebréngen an esou hire Plastikkonsum ze reduzéieren.

Ad 3)

Restopolis hält sech streng un d'Virgabe vum Ministère de la Santé a killt d'Sandwichen, d'Zaloten an déi kal Menüen op 4 Grad erof, wa se an d'Frupstut agepaakt ginn. D'Frupstute ginn dann an de Frigo

gestallt, bis se ausgedeelt ginn. D'Mataarbechter vu Restopolis oder vun der Schoul, déi d'Frupstute moies ausdeelen, klappen un d'Dier vun all Kllassesall, wa si d'Frupstuten virum Sall op en Dësch leeën. Duerch dat Klappe wëssen d'Schüler, datt hir Frupstut um Dësch läit, a si kënnen se dann eran an hire Sall huelen.

Ad 4)

An der Woch vum 4. bis den 8. Mee 2020 huet Restopolis déi nei Frupstut arodéiert an duerfir just eng reduzéiert Offer ugebueden, vu datt just Schüler vun de 1res-Klasse Schoul haten. Vum 11. Mee 2020 un goufen an der personaliséierter Frupstut eng breet Offer vu Produkter an lessen ugebueden. Dës Offer besteet aus kale Menüe mat saisonalen a regionalen Entréeën an Desserten, déi mat frëschem Uebst oder lokale Mëllechprodukter zoubereet ginn. All Gaascht, deen e Sandwich bestellt, kritt all Dag eng aner Zalot oder Cruditéiten als Bäilag. Jiddereen, deen eng Frupstut bestellt, kann och gratis Schouluebst a gratis Schoulmëllech als Optioun auswielen.

D'Frupstut ass déi beschtméiglechste Offer, déi Restopolis senge Gäscht an der Kris zerwéiere kann, a se bitt hinnen all Dag eng Menüoffer, déi equilibréiert ass. D'Offer vun der Frupstut ass en Noutbeholf an der Krisenzäit an erlaabt et Restopolis senge Gäscht all Dag eppes z'iessen ze zerwéieren, wann d'Kantinnen zou sinn. An dëser Krisenzäit si vill bedürfteg Kanner nach méi wéi soss op dës lessoffer ugewisen, well si soss villäicht keen Zougang zu engem equilibréierten lessen hätten.

Ad 5)

D'Schüler iessen an der Schoulass fir de Social Distancing ze garantéieren.